

Num. 11. 24.
25. 26.

1. Sam. 15. 23.
& 31. 5.

Tit. 1. 16.

1. Maccab. 1.
14. 16.
& 2. 20. 21.

Vnd laß sie alle zu Christo bekehret werden / denn dieses ist dir gar leicht zuthun. Da du den Geist Moyses auff die 70. Ältesten legtest / Weissagten sie vnd hörten nicht auff; Vnd ob schon Eldad vnd Medad nicht darbey waren / sondern in der Hütten blieben waren / so Weissagten sie doch ebenfals im Lager. O mache es doch zulezt auch also / Nimb doch den Geist deines Sohnes / vnd lege denselbhen auff vns alle / vnd laß auch desselben theilhaftig werden / so haussen im Lager / in Türckey / in Orient vnd Occident, in Hütten der Abgötterey leben. Von vns aber / die wir durch Christum zu dir kommen / Nim weg die grewliche Zäubererey / Abgötterey vnd Götzendienst / nemblich / den ungehorsam vnd widerstreben / mit welcher bezaubert ward Saul / vnd kam vmb Leib vnd Seele / das wir ja in allem dir gehorsamen / vnd in dir einen heiligen Göttlichen Wandel führen. Eröffne vnser Herzensaugen / das (auch ein Christ) wir erkennen lernen / das auch ein Christ mit der that / mit bösen Wercken / wie ein Heyde mit dem Munde / kan Gott verleugnen vnd sagen es sey kein Gott. Kömmt Antiochus / der böse Geist / vnd wil vns bereden / die Heydnische weise wieder anzufangen / O so laß vns doch ja von deinem heiligen Bunde nicht fallen / damit wir nicht verstockt werden / alle Schande vnd Laster zutreiben / Gib vns Mathatias Herze zusagen: Do sey Gott für / das were vns nicht gut / das wir von Gottes Wort vnd Gesetz abfielen / vnd wiederumb Heydnisch solten leben. Endtlichen erleuchte alle Herzen / die dieses Lesen / das sie fromb / bekehret / erleuchtet vnd Selig werden / Amen.

Cum